



UKA 15/23.1  
7. Oktober 2015  
Naaja H. Nathanielsen

## **Uunga siunnersuut: Aningaasarsianit akileraarutit pillugit Inatsisartut inatsisaata allangortinneqarneranik Inatsisartut inatsisaat nr. xx, xx. xxx 2015-imeersoq.**

(Aningaasaqarnermut Aatsitassanullu Naalakkersuisoq)

Naalakkersuisup oqaatigivaa siunnersuut manna Inatsisartut 2012-mi ukiakkut ataatsimiinnerminni aalajangigaannik piviusunngortitsinerusoq. Taamanikkut Inatsisartut aalajangiuppaat selskabit ilaannut selskabit akileraarutaannik akiliisussaatsinnginnissaq atuussinnaasoq, taarsiulluguli akiliuteqartarnissamut pisussaaffilerneqarsinnaasut. Taamanikkut inuussutissarsiornermut ataatsimiititaliap aalajangiuppaa akiliuteqarnissaq taanna selskabit akileraarutaattulli annertussuseqassasoq. Inatsisartulli aalajangigaanni taakkutsitaa maanna Naalakkersuisut siunnersuutaanni ajoraluartumik ersarinngilaq. Taamaattumik Inuit Ataqatigiinniit Aningaasaqarnermut Ataatsimiititaliaq qinnuigissavarput siunnersuut manna oqaluuserineqalerpat taamanikkut inuussutissarsiornermut ataatsimiititaliaasimasup isumaliutissiissutaa 2012-mi nassiunneqartoq sukumiisumik misissorluaqqullugu.

Siunnersuummittaaq avataaniit suliarortussat ilaannut akileraarusersuinikkut allanguuteqartitsinissaq aamma pineqarpoq. Inuit Ataqatigiinniit Aningaasaqarnermut Ataatsimiititaliaq qinnuigissavarput iluanaarutitigut annaasaqaataasussanut naatsorsuutigineqartunut atatillugu Naalakkersuisuniit paasissutissanik ersarinnerusunik piniaqqullugu.

Siunnersuummi aningaaseriviit annaasassanut immikkoortitassaaannut tunngasortaanut Inuit Ataqatigiinniit oqaaseqaatissaqanngilagut. Soorunami siunnersuutip tamakkiisup Aningaasaqarnermut Ataatsimiititaliamit misissorneqarnissaa naatsorsuutigivarput. Taamatut oqaaseqarluta siunnersuutip Aningaasaqarnermut Akileraartarnermullu Ataatsimiititaliamit suliarineqarnissaa innersuutigaarput.